

भौरा

गुन—गुन—गुन भौरा डोले,
फूल के कान म का बोले?
एती—ओती, चारो कोती,
रस पी के झोलिया झोले ।
गुन—गुन—गुन भौरा डोले ।

कविता: डॉ. पीसीलाल यादव
चित्रांकन: नरेश निषाद





चंदा मामा


चंदा मामा दुरिहा हे,
अकाश ओकर कुरिया हे
हमर इहाँ आवय नहीं,
अऊ हमला बलावय नहीं,
तभो ले ममा बढिया हे,
लगथे छत्तीसगढिया हे ।



कविता: डॉ. पीसीलाल यादव
चित्रांकन: नरेश निषाद

फुगगा

लाली पियर फुगगा,
करिया हरियर फुगगा ।
सुध्घर सुध्घर फुगगा,
नान्हे जब्बर फुगगा ।
बबा ह लानिस फुगगा,
नानू ल दीस फुगगा,
दादू लूटिस फुगगा,
फट ले फुट गिस फुगगा ।




कविता: डॉ. पीसीलाल यादव
चित्रांकन: नरेश निषाद


केकरा

केकरा दिखे हाड़ा—हाड़ा,
जबर—जबर एखर डाढा ।
जेती पावय तेती जावय,
पानी बिला एखर माड़ा ।


कविता: डॉ. पीसीलाल यादव
चित्रांकन: नरेश निषाद



कोइली



कुहु—कुहु कुहके कोइली,
गुरतुर भाखा बोले कोइली ।
मीठा बोल के मान पावय,
कान म रस घोर कोइली ।



कविता: डॉ. पीसीलाल यादव
चित्रांकन: नरेश निषाद

मेचका

बादर गजरे नारियाय मेचका,
पानी बरसे नहाय मेचका।
नंदिया—तरिया डबरा म,
तिहार कस मनाए मेचका।

कविता: डॉ. पीसीलाल यादव
चित्रांकन: नरेश निषाद



पानी बरसे

गड़गड़—गड़गड़ बादर गरजे,
तिरि—रिरि बिजली लउके ।
रदरद— रदरद पानी बरसे,
धरती — दाई के मन हरसे ।
रुख—राई अऊ डारा—पाना,
झूमर—झूम गावयं गाना ।
मेचका टेटका, चिरई चिरगुन,
नाचयं—कूदयं हो के बिधुन ।।



कविता: डॉ. पीसीलाल यादव
चित्रांकन: नरेश निषाद

फूल

रकम—रकम के फूले फूल,
रंग—बिरंग के झूले झूल।
ममहावय जग महकावय,
हवा झुलावय झूलना झूल।

कविता: डॉ. पीसीलाल यादव
चित्रांकन: नरेश निषाद



तितली

सुध्धर सुध्धर निक तितली,
पकड़ावय नहीं ढीठ तितली ।
फूल—फूल म बईठ—बईठ के,
रस चुहके मीठ तितली ।



कविता: डॉ. पीसीलाल यादव
चित्रांकन: नरेश निषाद